

全
浙
詩
話

全浙詩話卷四十五

會稽陶元藻堂村輯

男

廷珍

編次

仁和朱文藻映濤

參訂

同邑宗聖垣芥飄

國朝

章藻功

藻功字豈績錢塘人康熙癸未進士官庶吉士

有思綺堂集

思綺堂集序

楊雍建撰

豈績以思綺堂文集示予予受而

全浙詩話

卷四十五

卒業焉其質穿經史牢籠百態往往擲地作金石聲因賦絕句贈之予服豈續欲燒筆硯者屢矣近又出其所爲詩若干首命予序長歌短什纍纍乎得風雅之指歸吾安能測其所至哉

陶文彬

石門陳萬青填諱

先祖字仲玉號月山會稽人官福建漳州府同知有金臺錦城摩雲武夷等集

青瑤詩話 摩雲集中所存七古甚少有景陽宮井一篇云麝脂拭透晉王入後庭歌歇瓊花濕清溪蕭蕭一夜風月梵孤冷雙桐立君不見石羊飛出陽陵臺劫灰

燒寒天眼泣盛樅陽唐謂是詩詞意雋遠絕倫深得義
山神髓

聖垣按摩雲集有西湖竹枝詞二十首甚工爲人傳
誦詩云錢塘太守醉西湖堤上花枝也姓蘇郎似東
風儂似草將春吹綠到蘇蕪靈鷲曾飛仙洞來郎飛
湘水幾時回望郎心化鳥峯石郎未歸時石未灰葉
葉春風楊柳情青驄得得傍花行勸郎收却金丸彈
留個鶯兒叫一聲十錦塘邊是妾家小樓斜對木蘭
花西陵阿妹聲相似莫誤敲門去吃茶盛樅陽云十
錦塘一首與前人盤塘江上是奴家郎若來時好與
茶黃土築牆荊花金傳不朽

劉正誼

正誼字戒謀山陰人貢生

後甲集 會稽陶石簀先生祠余館之三年甲午遂移

楊躍雷近又三年矣凡有著作皆出其中躍雷在東雙
橋東有平仲兩株干霄直上過其下渡板橋緣崖而東
見修竹一叢門啟竹北路遶竹西登其堂曰何陋軒卽
躍雷館也明時爲商譔軒燒丹處今已易主人軒前架
月臺臺臨池畧如卍字春來鯀魚最盛堂堂策策四時
皆有花木其大者棠梨桂柏海榴綠萼皆數十年物近
種櫻桃橘柚八九枝三年後當累累結實獨夏無荷秋
無菊爲憾事耳東南望香爐玉筍諸峯宛如屏幃每烟
清雨過時白雲滿谷如練如絮如絲如縵倏忽萬變莫
可名狀五雲之門居人種竹而掩其半望之如洞天一

角疑此中有仙人焉蓋雖非余有而攬之者數矣老杜
詩江山如有待花鳥更無私余友戒謀詩草木有情應
念我烟霞無恙盡還君其不以余爲知己耶

越風 戒謀先生早負詩名其派別得有西崑而出入
於眉山放翁間朱竹垞毛西河梁蘅亭諸先輩俱交口
推許琴川閨秀張珮芬曾手錄先生詩定爲課程日必
吟誦數十首上元汪鶴亭贈先生詩有云太史賞音傳
荔浦美人低唱隔琴川蓋紀實也生平多隱德韜玉未
售而卒墓在龍山後爲西園舊地與詩巢鄰近鳳岡過
墓下有云生爲花月鬼死作珠玉塵其嗣君柳村達夫

柘亭與余同西園十子會

菊坡詩話 劉戒謀正誼懷古詩烟草離離野水濱荒
祠猶與釣臺鄰如何天意鍾豪傑生死都由兩婦人下
二句與明人余鏊咏韓信云可憐千古英雄將生死都
歸兩婦人詞意俱同唯由字較歸字爲醒豁王雨楓霖
淮陰侯廟詩英雄起屠釣生死在裙簪意亦相似然詞
句更警練

按鑑湖旁向有屋數椽名詩巢奉祀前代詩人賀季
真秦公緒方雄飛陸放翁楊康夫徐文長六人康熙
間鄉先輩於巢中結社賦詩者商和何嘉珩錢爲鼎
徐之域厲焯朱悅人王佳齡田易魯國書其一卽戒
謀也雍正間復益以十人今巢廢移季真等祀於載
山爲詩社者亦寥寥矣戒謀擅詩名最早琴川女子

張蘭芬容麗工詩得戒謀集受不釋手適下姑蘇山塘驛舫見鄰舟少年憑几揮毫忽風飛一紙入水張頻視有宛委山人字宛委卽戒謀集名心疑少年或戒謀令其弟以素箋索書書訖付與乃知真戒謀也含睇流盼若不勝情懷喪而返輒舉語同類爲詩瘦生曰何似何似者復作繫裙腰詞寄意有夕陽花影金仙舟心上客眼前頭之句一時傳爲韻事汝陰陳一泓太史寄詩戒謀曰吳中近事君知否香閣爭呼詩瘦生武進秦龍允宜興吳師石皆有詩紀其事

萬承勲

承勲字開遠號西郭鄞縣人官磁州牧著冰雪

詩鈔

本朝名家詩鈔小傳 開遠自少卽以詩名冰雪一編

人咸擬之孟東野查初白先生獨不謂然嘗贈以詩云

孟郊沒後千餘載苦語何人更別裁風雅道衰無至性
海山地大得奇才翻瀾滄淚隨聲出徹骨冰霜鍊句來
竊喜故人還有子一編浮白爲渠開蓋傾倒之至矣

周璇瑩

璇瑩字郎少山陰人布衣著有蠅潭詩鈔

越風 郎少西施山懷古云脂粉堂前野蔓平歌殘舞
散尚含情謀臣已結千絲網處女徒勞百鍊兵豈惜此
身圖報國欲將何物償傾城美人不愛黃金鑄合向煙
波變姓名通首全以意勝咏是題者多矣應推此作爲
絕唱

秦琛

琛字獻其號鶴洲會稽人諸生

越風 鶴洲有野眺詩云原野曠以閒條然息塵慮偶
因黃葉落忽見青山露境寂生遐思步閒得微悟回視
隔溪人移舟入深樹三四有洞庭始波木葉微脫之致
鶴洲有子幼而工詩有秋夢竹樓空之句惜不永年

章日躋

日躋字式九號目湖錢塘人有叙倫堂詩

叙倫堂集 姚佺序曰目湖詩人日游西湖有地必游
有人必游有景必游杭之有湖如人之有目章子誠能

目若秋水瞋眸奮發百川四瀆何不攝入西子一杯水中
四瀆不見大一杯水不見小故名之曰目湖詩人而
并爲之序 查繼佐序曰式九具曠懷日在山水間枯
筇野棹雖風雨不輟又時游三吳苔雪嚴陵之勝越江
涉淮行齊魯之鄉返於竹西歌吹慨然久之 周容序
曰式九好客善游其游歷齊魯吳越甌閩間所交莫非
其地勝流而勝流之抵湖上者又莫不願親式九坐恒
滿月夕雨後佳薈名酒扁舟結侶浹旬忘返曰明光無
刻不變故欲以閒情求之其爲詩清而遠肆而能節僕
贈句有曰每有好花遲遠客常因微雨入西湖友人無

不謂善狀式九者西湖自聞子將嚴因持諸先輩後集
經亂離湖光無主式九常嘆息謂嚴聞諸公時詩籌文
社無日不設而今寂寂至此近聞卿子張先生有是意
余殆欲如宋衛之佐小白然者式九茲意良厚也 馮
道濟曰式九之門自四方名宿而外酒人劍客名祢歌
兒恒滿戶卽其避暑湖心棹舟來訪者櫓聲相接 俞
次寅曰式九以中元夜大集同人至者幾五十人分十
小舟每各懸二燈爐茗絃管之屬無不具是夜微雨羣
舟任其所之夜半會於湖心亭上聚飲復聚於斷橋霽
月明甚余醉卧聞笙歌聲飄飄不謂人世也式九有詩

云言采潭心白玉蓮水燈雲管雜舟前暫教風雨成佳
事畢集人文動謫仙山月霽遲分夜半湖亭涼早得秋
偏迴流遞醉漁歌散四壁諸峯聚曉烟 孫豹人曰余
自始寧來湖上式九卽招同次寅暮飯放生池小舟逆
風西往至斷橋夜半矣呼世功公端起偕一二韻客下
舟雨作泊斷橋下俄而霽月出湖面絃管並奏痛飲極
歡至曉乃罷式九有詩云衆山煙霧曉沈沈夢裏猶聞
絲竹音何必太湖三萬頃六橋一水足湖心 姚山期
曰式九有游癖日與同人在山水間余賦詩贈之有云
沽家抱甕雁行去舟子索錢魚貫來到處都將酒器往

逢花卽帶淨瓶栽蓋紀其實也 又曰孫豹人客雲居
寺僧善釀酒無日不醉與次寅慶伯爲夏聲之集又點
定詩志數千百篇以去可謂不負是遊其歸寓廣陵也
章式九送之詩云七月來湖上湖山勝獨親是非存大
道頃倒盡才人每醉僧房酒渾忘客裏身梅花發江路
寂寂照征塵

潘天鎮

天鎮字允璽號靜齋太平人

三台詩錄 靜齋後群雁詩云旅雁南飛盡如何獨後
羣已孤天上月偏阻嶺頭雲短詔知難及哀鳴那忍聞

閨中望信者遲爾淚紛紛無語不切後羣却只落落寫去全不粘滯字面賦物詩之有體格者

朱昆田

昆田字文盎秀水人彝尊子著有笛漁小稟

本朝名家詩鈔小傳

朱昆田字文盎秀水竹垞先生

之令子也先生旣以文章雄一代又性好藏書插架至八萬卷文盎皆能讀之含英咀華才名掛人口一時有小朱十之目詩才雄鷺吐故納新無一字拾人牙後慧亦其耳濡目染胚胎家學者深矣潦倒諸生年僅四十以死才人無祿古今同嘆而遺集猶得附名父以傳人

生世上豈不樂有賢父兄也哉

王儒旦 王儒曾

儒旦字滄升儒曾字孝升錢唐人

雲護齋詩話 康熙乙丑八月之望王儒旦滄升儒曾
孝升邀同虞宏武通趙璉漁玉柴世堂子構蔡宗仁仲
安金起乾晉純姚與祁二京程斯彪虎文倪奕相公輔
孫元枝喻訖馮文言簡書翁介賓永章西湖讌集分韻
賦詩孝升爲之序詩皆一例存王氏兄弟者重其主斯
會也餘紀其氏名以見前輩雅集有觴必兼有咏流風
餘韻可爲銷金鍋子一解千古之朝滄升詩云孤舟蕭

散水光寒秉燭留髡興未闌
遠岫雲烟秋色晚滿湖風
雨雁聲殘清醪遠勝城中釀
綺席殊非市上餐競說瀛
洲今旣輟醉鄉終夜且盤桓
孝升詩云竟日持觴對友
生夜闌翦燭話深更舟前霧
重時飛雨水面雲流忽作
聲慷慨他年思楫擊殷勤
今日聽雞鳴天涯何必無知
己促膝談心卽弟兄

姜燮鼎

燮鼎字理夫遂安人

浙江通志 燮鼎嘯咏山水間與兒童樵牧笑語竟日
顯貴至門卽避匿不見所著詩冲淡雋逸迥出塵表多

隨手散逸好事得一二藏之哀輯成帙名高山集

田 易

易字易堂山陰人諸生著有快秋齋稿

越風 易堂東潭書屋云小橋東去擬江邨仲蔚蓬蒿
水際門物外漁樵誰作侶人間臧否莫輕論詩才飄逸
仙曾謫吾道艱難拙自存却恠昨宵眠未穩夕葵負米
憶晨昏括囊无咎人間臧否一語可作座右銘

盛 唐

唐字元白山陰人諸生著有茗柯齋詩集

越風 元白宮人斜云自閉深宮怨綺羅羊車聲斷幾

曾過豈知夜夜荒邱上宿草翻沾雨露多屬思幽遠

章大來

大來字泰顥號對山會稽人歲貢生著有後甲

集

菊坡詩話 對山沈酣六籍於漢儒諸說外訛醇雜處
別有折衷曾在西河門下故西河有吾得泰顥而經學
始明之譽其爲詩高處髣髴大歷長慶卑處尤不讓元
祐熙寧晚年嗜學少陵而力終不逮

後甲集

黃宏達行一年三十許從學爲科舉之學小

試不售素不解詩一日忽驗兩句卜珖華山又一年吉

凶無定惱金仙問之云方閱堯山堂外紀用孟賓于事
予續成慰之曰故園楊柳分明在定染藍衫早着鞭故
園楊柳亦用賓于獻主司中語 葛天師者爾若之弟
子內衡之法孫也主偈心十餘年歌詩彈琴有雅人深
致上座演法華孔雀二經人天供養士女雲集始寧葛
我培贈師一聯曰說四十九年法曰何嘗說法點悟了
山中頑石解百千萬部經是真個解經歡喜煞座上如
來余與陶君素書姪孫錫文由鮑柳二姑峯踰師古奧
晚憩偈心寺尋師夜話共得詩三首今我培素書錫文
皆墓有宿草而葛師亦圓寂久矣人生如電光石火欲

不朽何可得也詩附錄於此寫憂攜數子攀陟此嶙峋
流目山南居高下如蜂屯玉碎川流細金鋪隴色新四
野暝烟合浮峯雲外身落日吐餘光水波生萬鱗飛鳥
暄投樹微風吹涼巾坡陀陰崖路回首更逡巡茲山匪
真區師古乃中谷丹青名山峙左右兀若龍象伏秋晚石
渠寒草根鳴瀧縮唯餘長江流滾滾遠在目平岡偃古
松斷岸依修竹鑄石土花填摩挲不忍讀靜聽數鐘聲
循牆走佛屋老僧向我笑卽栗穿中堂香厨晚飯熟咄
嗟供客嘗坐久月上遲徐步窺南窗篁筍涵翠彩籬落
映微光須臾林樾開寶月懸華幢宿鳥報初更游人樂

宋史何嘗嚴上樓愧乏山中糧

聖祖按對山先生送其族姪芝山宰閩清詩云倘過
梨山問瓜瓞爲余重拜練夫人人多誦之考夫人爲
章仔鉤妻仔鉤於閩王審知時爲高州刺史檢校太
傅當其仕閩時邊鎬王建封二校坐法當斬夫人爲
請而釋之其後南唐遣江南安撫使查文徽伐閩鎬
爲行營招討使建封爲先鋒使破建州屠其城時仔
鉤已沒夫人寓在城中二校遣夫人一白旗曰植旗
於門召陰滅士卒勿犯矣此所以報也夫人曰君幸
念舊德顧全此城否則吾與衆共死義不獨生也二
校感其言遂止屠故至今章姓稱爲全城章氏而練
夫人之名滿天下然夫人實姓楊氏以其家世居練
湖遂稱練氏後世竟以練爲其姓罕有知其姓楊者
卽章氏子孫亦多不識也建州卽今建寧府府
署在山椒練夫人墓在太守宅門下大堂之後

金壁

壁字晴村山陰人諸生著有銅鶴山人詩集

國朝詩話 山陰金晴村壁荆溪吳他山介于交甚密
吳天死金窮死蕭山詩老沈漁莊堡壘交兩人鬻產刻
其詩金詩清朗吳詩韶秀金佳句如江上懷古煬帝幾
何花歲月寄奴一片莽江山峯抱金陵全盛勢潮吞鐵
甕可憐聲陸丞相祠君臣魚腹同埋日家國波心立盡
時又登長干寺浮圖如螺山髻環鍾阜似練江光抱石
城

謝煥

煥字其章山陰人諸生

後甲集 其章八九歲時便畧解小詩一日其父於樓

上命客王瞻山明高唱二句曰聞說超宗有鳳毛小樓
今日見兒曹意輕之也煥應聲曰須知也是三公相要
與先生解贈刀王因好好連贊不已復以贊不已三字
爲題煥曰本是無知識裁詩亦妄談高軒今一過謬賞
愈增慚今十五歲矣方舉制義未暇吟咏也瞻山每向
予道此事從容問煥末句何解煥曰呂虔以刀贈王祥
祥爲三公祥後復贈覽煥本以祥擬先生以覽自比也
煥時本師樂字典臣四明人亦頗能吟

傅廣熹

廣熹字師晦會稽人

後甲集 余自二十授經至今二十餘年耳弟子不過
百餘人而從業及死亡者已衆其最可痛者傳廣熹師
晦施鼎爵廷一廷一日誦數千言久而不忘精於算法
余方屬以溝澮同城及四時置閏之法而乙未遂已師
晦係厚村王雯次子行文短小清新在文簡公祠從余
學詩一日詠雁影有曰瀟湘一夜雨雲斷暗相依咏水
中雁字曰千行不盡相思句一到衡陽擲筆回嘆其從
余不久也丙申果亡

孟 濤

濤字悔餘號梅溪山陰人雍正間舉人官緝雲

教諭著有梅溪詩鈔

越風

梅溪有楚中懷古詩云夜半楓林叫斷猿女蘿

香草等煩冤雲流巫峽荒唐夢火入夷陵慘淡痕蒨屋
一椽祠舊主色絲五月餉忠魂無風莫漫譏儋楚騷客
哀歌白雪存荒唐夢慘淡痕八字工於鍊意結亦警絕

景星杓

星杓字亭北號菊公仁和人
有山齋客譚初堂詩集

山齋客譚 王建章序曰景子亭北余故交也儻負
奇不諧於俗工詩古文下筆千言立就意有所不可雖

繫馬千駟弗視也性頗好客客有善談論者一語相合
卽傾肝吐膽不肯背負嘗與人抵掌論天下事直據所
見無囁嚅渙浚之態以故不能降志於富貴之人簞瓢
屢空晏如也又好菊種之盈畝花時觀者日數千人景
子倘佯其中呼朋好酌酒欣賞歲以爲常故自號菊公
云菊公幼失所怙豪俠自喜家中落壯歲折節讀書著
述頗富 吳耕序曰吾友景子菊公識見超卓氣復豪
邁不屑與流俗競短長家最貧事母最孝待友生最真
摯更長於詩古文詞皆有所本故余三十年樂與之交
也家居臨安余嘗造訪之見其割鮮奉母而待予則清

酒一壺蔬食一豆極談笑之樂嗟乎予媿非郭林宗而菊公之操方之茅季偉則難乎其爲軒輊者矣

王倩

倩字曼仙山陰人

越風 曼仙詩學力充膽才臆足以副之清新磊落無一語蹈襲前人讀其詩可想見其胷次如嶺西雜咏云樓頭花萼嶺頭松梨壁湟關隔幾重贈我佩刀猶未解明年應化鐵芙蓉畫僊頻翻秋水經管花未吐老清寧從今不煮醫蠶酒說劍談天總厭聽蕉園竹枝云櫻桃滴滴笋纖纖茆草堂中斑竹簾昨夜山城賒酒到淡黃

梅子蘸青鹽白雲原是楚山多咫尺瀟湘不得過天淡
夜涼愁獨語有人勸買白鸚哥諸絕如古梅香茶於香
艷中自見清老而語語生關總無一個人處

嚴 煨

煨字曙升一字琅巖杭人顯亭孫有晚晴軒詩
選

晚晴軒詩選序

嚴仲章撰

吾弟曙升生而穎異既長工制

舉義遂旁及於詩古文詞吾家自高曾以清白起家所
蓄古今書籍不下千萬卷自癸酉一炬竟無存者吾弟
既艱家食而薄游所至一時傾倒詩詞之作亦唯此時

爲多初吾叔雨堂公恢奇超邁屢躋場屋年未五旬薈
志以歿吾弟稟異才與吾叔先後相亞而天厄其遇復
不假以年亦與吾叔差相類予因序弟詩又未嘗不潛
然於吾叔之生不偶也同堂仲氏傳焉所爲詩亦特有
傳授其所就尚未可量今吾姪垣以筆耕奉姆又惓惓
於父之遺稿詩曰夙興夜寐無忝爾所生垣姪勉乎哉
隨園詩話 顧俠君先生選元百家詩夢有古衣冠者
數百人拜而謝焉杭州嚴曙升恨贈云但見三吳書板
盛不知十載選樓忙王介眉撰通鑑成而未梓儲梅夫
贈云二十一史加前明王郎鏤板育中行

余 崢

崢字元平號高妙山陰人諸生著有清風草堂

集蒹葭亭詩鈔

越風 山人性情如寒巖枯木詩肖其人當其思入杳
冥遂覺跡無町畦咏淚云江山不語看人多甚欲無情
奈淚何不見英雄回首日漢王擊筑楚王歌較羅江東
作殊勝又浦口夜望云長途幾日出峻嶒浦口南來客
思增未訪六朝先一笑隔江燈火並金陵又揚州云煙
花歌吹浩無邊回首揚州絕可憐小杜亡隋兩春夢晚
風無賴又千年鵲啼花落一往情深

吳山

山字東山會稽人

越風 東山丰姿瀟灑喜吟咏幕游吳楚間韓青琳見其夜泊一絕愛之爲畫春江夜泊圖其詩云解纜江門日已晡楚天雲樹半模糊何人攜得王維筆畫我春江夜泊圖此詩阮亭見之亦當相視莫逆豈獨青琳愛之哉

章本成

本成字大枝號密林會稽人諸生著有密林詩集

越風 密林爲西園十子之首詩得浣花一體出門云
還家甫兩旬出門何所適人生逆旅浮我工客中客身
登不繫舟室留未煖席妻孥慣別離惟勉各盡職去志
勿復戀江帆健如翮妻孥十字沈痛情翻作灑落語倍
覺黯然

虞湘堯

相堯字在欽舉人

詩衡 除夜習用典故一經鍛鍊雖腐亦新在欽除夜
感懷云詩因慵懶無心祭鬼避清狂不待讎不待二字
精絕

周永齡

永齡字舜伯號西岡仁和諸生

湖墅詩鈔

周西岡三試棘闈不售遂服賈以孝養康

熙戊子己丑歲大饑鉅妹壻張武遷設廠賑濟論詩宗
唐音於宋惟尚蘇陸黃范四家嘗有詩題宋四名家詩
後云中盛不復作風氣墮庸熟溫李尚奇麗晚唐陽春
曲降自五季餘餘子俱碌碌宋興星聚奎文章返郁郁
自成一家言應首推蘇陸能敲金戛玉則石湖山谷四
子賦性奇臭味同一族究其所要歸大率在不俗窮且
樂山水不屑問帛粟達則厭廟堂頗輕位與祿故其下

筆神一本平時蓄氣可通虹霓力能扛鼎足清思入太
虛妙響落琴筑予亦江海人淡然無所欲雖無八斗才
喜展名篇讀似清風徐來似明月在屋烏逢芳樹棲鷗
向澄波浴會見天地心撲去塵面目

王鴻烈

鴻烈字子鴻蕭山人

詩衡 子鴻詩樂府最工高樓月云月意欲何爲照儂
青青髮儂佳至高樓望郎不望月行路難云蛟乘舟濟
人溺寧溺不上舟虎乘車起人躓寧躓不上車豈不知
舟與車彼其之子不可與同居又讀楊震傳烈火爍堅

鐘不能燒天風寶劍切玉璽不能斷流水黃金盈千鎰
不入夷齊室亦古質可傳

鄭錫

錫字彞章號雲叟會稽人著有書帶草堂詩稿
越風 雲叟有送吳樸庭入都云酒滴眞珠釀別離河
梁欲賦且遲遲柳枝入手鳥啼處溪水漾船人散時四
月黃梅成小雨一窗紅豆寫相思才名早動宣揚里不
賦蒼涼感遇詩五六現成語如此工麗

孟士楷

士楷字孔木號晴山會稽人明經著有山暉堂

詩草

越風 孟公學醇德邵鄉人重之不以詩名而發言清
婉可諷方諸古樹含香澄潭映月其卽事云冷煙細草
簇春泥百舌倉庚處處啼盡日溪頭臨水坐楊花吹過
板橋西松枝滴露鳥棲定月滿蒼苔風動簾漫道幽居
來往絕白雲夜夜宿茆簷二絕自然閒淡想見其人風
度矣

何嘉延

嘉延字奕美號五圍山陰人宏仁季子國子生
有綠水爾耳等集

國朝兩浙詩鈔

何五園爲明末侍御史宏仁之子宏

仁號書臺崇正丁丑進士歷建平高要知縣外艱歸浙
東師起授御史丙戌師潰投厓盡節絕而復甦入陶介
山爲僧未幾死康熙丁卯從祀侍御於郡庠之園有詩
謝學師陸公云我從小讀文賦江左平原夙所慕慧
曉旣標清介風敬輿更饒經濟具先生鍾秀啟後人才
名早擅聖湖濱鵬搏已迅秋旻翮龍躍猶稽春浪鱗泮
水棲遲澗水側吾郡生徒歸治埴禹山盡探赤珪文蘭
渚偏增絳帳色談經自昔重儒冠莫道無羶官最寒會
看卽直芙蓉殿豈使長餐苜蓿拌先生身爲名教主侏

節遺忠尤所取久歎伶仃賸偉元誰復沈淪問皋羽一
從化碧入重泉埋沒荆榛四十年荒阡孰表陶潛墓新
史今增袁粲篇不料闡幽叨盛典賜褒隻字千秋顯澤
宮蘋藻得長歆隴道松楸賴勿翦先生高誼古人敦百
詣全家感殉存祇爲歌魚鰾作客未獲銜鱣學報恩歸
來懷刺拜堂下感公交頤淚如瀉買絲只繡陸平原不
繡邯鄲養士者

文藻案 國朝兩浙詩鈔有兩何嘉延一字奕清與
國初人並列一字奕美有詩作於康熙丁卯是在康
熙中然不知是兩人還是一
人今不敢併合仍分列之

魯士

士字思亭會稽人明經官訓導

越風 思亭江右舟中詩云急流如鼎沸緩流如鏡平
孤舟一日中憂喜相間生幸有片帆風迅若飛鳥輕薄
暮一翹首百摺晴山橫入險出險盡前二十字境遇不
常大率類此

倪繼宗

繼宗字太真號復野餘姚明經官遂安訓導

越風 復野漫贈詩有交情柔似水詩意好於春窗小
花侵案樓空月近人之句真覺一塵不染其語可以證
禪

王 法

宏字上道號抱山嘉興布衣有藝菴軒詩

國朝兩浙詩鈔 抱山學詩朱竹垞檢討之門檢討稱
爲大雅遺音嘗同諸子集驅觴分韻詩云昨者屢升堂
分題修竹裏茲焉重過從梁木敢傾圯朱郎風雅才吾
黨情所企梧不期清吟開徑待數子翠釜享鮮鱗銀餅
瀉綠蠟且耽永日游詎嘆流光駛酒罷暑亦忘餘興狂
不已爲問酒邊人良會疇續此

陸 韜

韜字子容錢塘人

山齋客譚 錢塘陸韜字子容少負異資好讀書經傳
子史背誦如流邑令梁永植試童子以古文辭擅場列
第一廉其貧捐俸贈之盡以買書晝夜讀患咯血又問
友人假二十一史讀疾愈甚遂亡其師張秦亭祖望諱
綱孫哭以詩曰荒園寂寞綠苔生腸斷當年陸士衡春
鳥不知人已去棠梨樹上兩三聲其內兄某欲和不就
夢子容曰子欲和不得耶予和己成爲君誦之誰向蓬
門問死生諸公枉道駕車衡我游泉路無他樂惟聽蕭
蕭松柏聲某以告秦亭乃流涕曰聲情淒鬱何其詩之
神似子容也傳寫人間和者甚多王丹麓和曰一讀遺

編百感生文章無價沒權衡鍾期去後知音少腸斷高山流水聲景星杓和曰薄命才人惜友生顏回一曲動張衡不堪手錄情傷句酸惻微如籬露聲

張文蘆

文蘆字風林蕭山人由舉人官至濊江府知府詩衡風林冬夜有入戶清光半夜月偏人寒氣五更天寫景之筆幾如顏平原書法力透紙背

方蔡如

蔡如字文翰號樸山淳安人康熙乙酉舉人丙戌進士官直隸豐潤縣知縣著喚學詩集虛齋

集

詩衡 淳安方樸山先生嘗作憶舊七絕六首做元遺
山論詩絕句其標格亦逼肖遺山大都與何焯方苞平
時講貫之作其一云烟柳風松雪竹池古題翻破卽佳
詩磨兒立地看成佛笑殺瞿曇黃面師自註在京師與
何義門先生論詩偶及宋時有應百篇舉者太宗以松
風雪月天花竹鶴雲烟詩酒春池雨山僧道柳泉二十
字爲題令各賦五篇先生笑曰此二十字是今人詩料
每一篇不過將這幾個字紛紛總其離合耳因嘆作詩
乃爾古人又何苦撚斷幾莖髭也其二云粧成未了便

相催作伎何人向爵臺空似九疑生對面離離七十二
荒堆自註查初白銅雀臺詩有云到底不知埋骨處教
人何處望西陵余偶舉示義門義門嘆以爲佳亦自誦
其舊句云九峯南望尚堪疑何患君王七十二余謂二
詩並妙猶如崔國輔云粧成猶未了魏帝使人催恐望
西陵墓田者亦聞其無人也義門亦大爲解頤頗謂此
語未經人道過何不入詩嘆唐人使事之妙崔詩卽所
云在伏鬼時過也其三云祭風臺事故非經詞客標題
便有靈賦手黃州添赤壁未妨俗語趁丹青自註義門
謂葛相祭風臺此小說家狡獪詩人豈宜染毫余謂亦

壁不在黃州而東坡前後賦之倘可從其例否義門未
有以應也其四云妙絕長歌續短歌延州宮相鬱嵯峨
阿誰噉黑流傳賦一字師推子朗多自註梅村歌行是
讀書人語然用字亦未契勘在因隨手爲標數處其五
云帶經堂與曝書亭五際芳詞鬪雪清却是項斯窺法
乳地名橫雜古人名自註亡友項霜田謂詩有側看法
竹垞詩側看多人名漁洋詩側看多地名也其六云短
歌慷慨費沈吟誰識行間有殺心作易果然知道者龍
眠山下老儒林自註宗人望溪先生謂魏武短歌行是
將殺孔北海時作但爲君故沈吟至今此卽丁晉公所

云爲王子明遲我十年作宰相之意君指孔北海也明
明如日何時可掇直自道其不得之熱中矣末章山不
厭高云云則又所謂譬其焉往將欲取之必姑與之也
余因問呦呦鹿鳴一解云何望溪謂魏武曾舉孝廉故
云爾真解頤之論其第四章先生晚年改本云銅鞮秋
衾事若何前朝宮相短長歌更爲新警

按先生博聞強記自經史諸子自家靡不淹貫有叩
卽應如傾河倒峽滔滔而於漢儒箋註尤能指
其訛舛常論禘祫郊廟之制暢達精確且有折衷與
同社及門析疑辨難能發前人所未發乾隆初舉博
學宏詞不就嗣以經學薦亦不應年八十靈光巋然
照耀兩浙先生儀表豐秀方頤廣額聲如洪鐘昔人
謂永叔耳白於面宜其得名與壽也嘗謂余言西河
檢討有古今體詩數十首文若干篇皆未鐫行者吾

猶記憶能書之當與君商訂續刻一編以垂不朽蓋先生爲西河高弟子其言有以時余適有嶺南之役倥偬未有應及余由粵歸而先生已歸道山矣爲之悵然

沈元滄

元滄字麟洲號東隅仁和人康熙乙酉中乙榜授文昌縣知縣著滋蘭堂集

國朝詩錄 康熙甲寅閩變永嘉令馬公玘與溫處道陳公丹亦同時殉難後馬公子觀察君陳情行在得諡忠勤麟州賦詩以紀其盛云一官迢遞到巖疆閩海烽烟正擾攘此日陳豨終負漢同時南八自忠唐三年亂定聞家祭兩字名尊慰國殤廟社靈旗應儼在清蒐

千古戀同鄉

本朝名家詩鈔小傳 先生於學無弗窺尋而陶冶情性尤工爲有韻之言探源騷雅出入於杜韓蘇陸諸家一時朱竹垞湯西厓陳恪勤諸公咸推重之由取法正而根柢深也

查爲仁

爲仁字心穀旣罹患難而導師爲贈道號曰蓮坡本浙江籍僑居直隸三世遂爲宛平人康熙辛卯舉人著蓮坡詩話蔗塘詩鈔

本朝名家詩鈔小傳 查爲仁字心穀年十九舉京兆

鄉試第一主試事者武進司農恭毅趙公也公故以革
銅商事與執金吾陶和氣者相水火欲甘心焉謂榜首
固富人子且少年名不出里閭是奇貨可居遂鉤致以
與大獄旣煅煉成而心穀當死非常繫請室越八年始
邀矜釋心穀固才士旣顛蹶無生意乃就白雲司葺板
屋數間日讀書習靜其中高雲上人爲榜曰花影菴七
畧四章恣意佃漁結撰爲工篇章日富其自序云綴毫
肺石之上染烟牢戶之中比諸候齋寒蟬自撫胃臆含
酸茹歎詞意歉然然鑑訇陶冶實能與古人相頡頏一
時名士贈答頻煩張得天尚書至稱爲唐子畏後身而

難息其有才無命心穀旣出獄則結園沾水之西臨流
蒔花閉戶疊石賦夕烟於琴幌吟曉日於書床而津門
爲水陸之衝去京師十舍而近冠蓋相錯賓至如歸投
轄贈鞭徵歌對酒許渭符司馬所云庇人孫北海置驛
鄭南陽而高宗山孝廉亦有東山麗句諧絲竹北海名
賢共酒樽及甲部攤經丁部史紅兒記拍雪兒歌之句
以贈三復徵吟猶令人想見名士之風流太平之盛事
也已

沈樹本

樹本字厚餘歸安人康熙壬辰進士及第官翰

林院編修著有輪翁詩集

國朝詩錄 從來學蘇詩者祇得其隨手徵引波瀾不窮其弊往往流於縱肆此獨於用意正大處求之卽質之元遺山必無滄海橫流之目王載陽少工詩人無知者輪翁見而賞之徧告詩壇名遂著載陽吳江人故以楓落吳江爲比贈王載陽云唱徧楊枝又橘枝洞庭林屋有新詞誰知楓落吳江冷未是崔郎壓卷詩

孫國珍

國珍字仕隆號惕崖長興籍歸安人少司空在豐從子康熙癸巳舉人仕錢塘敏諭有惕崖遺

稿

國朝兩浙詩鈔 楊崖嘗讀王梅溪集有年逾四十尚
何堪之句依韻續成二詩云年逾四十尚何堪自笑謀
生無一諳瓶粟長空憑拙婦園蔬學種任痴男每口貧
士聊資祿却愧娛親未有甘歲月虛磨人易老那能作
繭效春蠶年逾四十尚何堪久歷人情應亦諳無以爲
家身作客不如歸去膝盈男途窮已識羊腸險舌在寧
忘雞肋甘今是非渾未省歐絲難比抱筐蠶

沈章

章字宗玉嘉興人

詩衡 宗玉隋堤懷古三首綺麗纏綿頗似樊川丁卯
一流詩云煙谷春堤翠黛連垂楊不結舊龍船阿麼曾
濺風流血一樹瓊花變杜鵑邦溝新碧晚濤平楊柳曾
遮殿脚行誰道雷塘歌吹歇月明重按玉簫聲廿四橋
邊颺酒旗玉鉤斜上草離離風吹一陣梨花雨又是江
南寒食時

丁 甞

甞字息園山陰人太學生著有泊如軒詩集

越風 息園臘月十五夜對月云皓魄依稀玉鏡圓他
鄉合似故鄉邊勸君莫厭通宵坐再見須知又一年皖

友李嘯村詩故國有人終夜望今年祇此一回圓與此
首異曲同工又病中云藥爐茶竈結清緣賺得閒身整
日眠不忍家人知客病裁書只說健於前亦淺語入情
何且純

且純字巽子錢塘人康熙甲午舉人官知縣
雲雙齋詩話 張秦亭集有哭何巽子兼慰岱瞻諸子
詩才人無比如何遜不道別來條已亡任瞞諸孤誰解
恤幾番懷舊媿劉郎巽子爲秦亭所重其能詩可見矣
惜全集不傳

江 濟

濟字道之黃巖人康熙乙未進士翰林庶吉士
三台詩錄 道之弔家烈婦詩云手挾霜鏃見義真鸛
威偏妬可憐春血流黃土應成碧潔比冰壺不染塵生
死一時無轉念是非千載任斯人東江夜半悲風起冷
月滄波泣鬼神烈婦死於邑差戴德之手士大夫爲詩
弔之

傅王露

王露字良木號玉笥又號閬林會稽人康熙乙
未賜進士第官翰林編修加中允著有玉笥山
房詩

海嶼詩話 聞林登昊天閣詩萬類俱併覆孤懷或鑒
臨九閣知易達虎豹莫森森喫緊閣名發揮遂與尋常
登高望遠者迥別而生平退休不遂之意亦隱然見於
言下

隨園詩話 人有生而瀟灑者不關學力也傅玉笥先
生有句云鶯花日辦三春課風月天生一種人又游西
湖絕句云正是金牛紀瑞年小春風景似春天蓬萊原
近孤山寺游舫多停六一泉一到湖心眼界寬雲光瀟
灑接風濤三朝恩澤深如許莫作瑤池清淺看

應葵字小眉號眉菴歸安人康熙乙未進士由翰林院官至兵部侍郎著青瑤草堂詩集

隨園詩話 余試鴻詞報罷蒙歸安吳小眉少司馬最爲青盼五十年來其家式微今年游粵東過飛來寺見先生題詩半山亭云西徑崎嶇上東峯宛轉行半山山過半飛鳥一聲輕讀之如重見老成眉字先生諱應葵弟諱應枚其封君夢蘇眉山兄弟而生故一字小眉一字小穎小眉巡撫湖北平反麻城冤獄爲海內所稱小穎亦官至禮部侍郎

國朝兩浙詩鈔

眉菴有甫後坐清暉閣詩云高閣憑

虛野色寬清暉面面挹闌干泉聲自愛風前聽山色偏
宜雨後看古木陰沈連岸碧濕雲浮動滿池寒此間林
壑爭千古底事神仙覓大還

金以成

以成字素存號補山會稽人康熙戊戌進士官
翰林編修出知兗州府

越風 補山先生未第時以百韻長篇投新城王公公
曰詩家上乘全在妙悟取所訂唐賢三昧集貽之補山
私議新城一生只到得王孟境界杜之北征韓之南山
豈是一味妙悟者蓋敏妙出自靈府而沈酣資於學力

其持論若此故爲詩每以書卷掩其性情茲特取其氣機流逸者入選

周徐彩

徐彩字粹存會稽人康熙庚子舉人著有名山藏詩稿

越風 孝廉政漁經史閉戶著書詩不苟作故所存無幾氣味深遠爲風雅正音

胡浚

浚字希張號竹巖會稽人康熙庚子舉人著有綠蘿山莊詩集

菊坡詩話 竹巖深山半籬雪寒澗數重花乃其山家
觀梅詩也然此境非身歷者不知其妙

葉新

新字唯一金華人康熙五十九年鄉舉雍正間
授華陽令累遷成都建昌贛州各郡守有良堂
詩存

金華詩錄 感秋八首次秋興韻有云幾嘆華年吟蟋
蟀擬翻幽怨譜胡笳泣鬼神詩吟獨苦封侯舊夢醒多
違甯戚歌餘人悄悄梁鴻廬下日遲遲萬里書惟憑旅
雁百年身竟等浮鷗囊空劍在心猶壯裘敝書存志未

移皆工不及全載附見於此良堂鯁直詩獨宛約靜細
不露鋒稜此數語稍見慷慨悲歌之意讞獄章江一章
亦然

按良堂字贛州時南昌令喜事興大獄邑民饒合德
爲仇所誣捉風捕影事連撫贛二郡至二百餘人檄
良堂勘之平心和氣隔別推鞠得被誣之故言於上
官不能奪衆口因作讞獄章江立秋日書懷詩云朝
來秋氣渡章江細雨斜風送晚涼到處倉皇傳市虎
幾時談笑射天狼手鷹人憶尊臨美元亮新愁松菊
荒狂直從違關吏治好憑伸詘卜行藏觀下四句蓋
以去就爭矣旣而事文制府委江南監司何公來良
堂一一剖折獄乃定全治甚衆然終以爲治不肯苟
同於人被劾罷官去去贛之日民皆垂涕父老引里
諺曰虔州改贛州江水兩分流富貴無三代清官不
到頭吾贛民無福於公何憾其初署篆嘉州訟牒皆
當堂判發有會稽錢生者流落其地一日具牒丐飲
助詞頗哀詭動人猝無以應判一絕於後云兩年宦

轍等翼蓬聯得清名是屢空慚愧窮途步兵尉不堪持贈袖間風一時諸生競相褒和傳爲佳話

嚴遂成

遂成字海珊烏程人康熙辛丑進士官阜平知縣

青瑤詩話 詩不賴挫則不能沈鬱然古詩易於抑揚而近體難於運掉得之近體其精采必倍加如嚴遂成曲谷鎮云鵬盤大漠寒無影冰裂長河夜有聲唐縣云白骨未收銅馬賊青山猶繞樂羊城袁薌亭樹下第二云共說文章原有價若論僥倖豈無人皆頗挫入神卓然名句

魯曾煜

曾煜字啟人號秋騰會稽人康熙辛丑進士授

翰林院庶吉士

連坡詩話 魯啟人庶常曾煜過津門停舟見訪贈余
詩云我未江干擬卜居君猶憔悴似三閭新交却得蒼
涼後舊事重題涕淚餘善舞寧憂客試鶴出游唯有子
知魚短檠何日能相對風雨西窗夜讀書

按秋騰先生自授庶常後旋即請假南歸無出山之
志以家貧筆耕數十載著述多在客中曾掌教汴州
杭州修志廣州故其詩名三州詩集余每嘆近人作
詩罕知六義者其視河上云咽喉高堰急心腹兩淮
憂是賦而此也不寐云雖語如人絮雞鳴若
鳳難是比而賦也庶常於此道殆三折肱矣

錢陳羣

陳羣字集齋號香樹嘉興人康熙辛丑進士由翰林歷官刑部侍郎晉階刑部尚書贈太傅諡文端著有香樹齋集

隨園詩話 錢香樹先生爲侍讀時出都泊濟寧立船頭爲霜所滑失足入水家人救以篙得不死笑謂賓客曰吾聞陞水死者必有鬼物憑之倘昨夜遇李太白便把臂去矣明日過李白樓題云昨夜未曾逢李白今朝乘興一登樓樓中人已騎鯨去樓影當空占上游又題紅葉云一夜流傳霜信遍早衰多是出頭枝庚午典試

江西寫榜吏陳巨儒鬚鬢如雪求公贈手跡爲榮自陳
年七十手寫文武試三十二榜公贈詩云桂籍憑伊腕
力傳白頭從事地行仙自言作吏中書省曾侍朱衣四
十年

陶上銘

同邑王增填崑

先府君字西巖號雙峯候選州同知

詩衡 余舅祖雙峯公自幼聰穎年十四父文彬爲彭
水令隨侍蜀中彭有雲頂山甚峻父命讀書山寺每當
月夜有大白鹿出游經書幌外聞誦聲必立聽片時乃
去相傳此鹿乃千年物也公嘗賦二絕云觺觺斑龍角

一雙月華晴照厥形龐幾回錯認寒梅樹疎影橫斜上
紙窗憶昔山中馭僮僮主人一別幾何年神僊去路應
猶識導我芒鞋到洞天郡守聞之大爲稱賞爲鐫於崖

周顯槐

顯槐字應三東陽人

金華詩錄 應三嘗夢隨歐陽子遊平山堂自號六一
侍者作詩出入王韋諸家性靈灑灑迥絕恒徑

詩衡 應三訪友山莊云白雲罨墟落不知君住處隔
林間樵夫言從溪邊去石逕風蕭蕭落葉紛無數到門
一檠然清樽此晤語余謂此詩只留上四句更妙願與

識者商之

全浙詩話卷四十五終

全浙詩話卷四十六

會稽陶元藻篁村輯

男 廷珍 廷琬 編次

仁和朱文藻映滢

參訂

同邑宗聖垣芥颿

國朝

陸奎勳

奎勳字聚侯平湖人康熙辛丑進士官翰林檢討著有陸堂詩草

隨園詩話

余自幼聞月華之說終未見也同年王大

全浙詩話

卷四十六

一

司農秋瑞夢月華而生故小字華官後見平湖陸陸堂先生云康熙辛酉八月十四夜曾見月當正午輪之西南角忽吐白光一道已而紅黃紺碧約有二十餘條下垂至地良久結輪三匝見月不見天矣先生賦云今宵才見月華圖織女張機也失妍五色流蘇齊著地三重輪廓欲彌天

金虞廷

虞廷字颺言會稽人康熙辛丑進士官魚臺令著有梅槎集

越風 海槎宣城詩云清江端許浣征塵夢裏深情見

古人一棹宣州自來去桃花潭上哭汪倫愛古人卽薄
今人意在言外

戴望嶧

望嶧字鄒山浦江人由進士分發湖南授寧遠
令

金華詩錄 鄒山東阿道中懷古云山繞阿城驛路長
陳思舊蹟已荒涼空憐詞賦黃初體不及東平有憲王
又荏平道中懷古云火色鳶肩迴出儔都從事後識英
流如何房杜稱名相卻遣常何薦馬周二首懷古詩都
用比事法義山詠史之遺

馬維翰

維翰字墨麟海鹽人康熙辛丑進士官至四川東道有墨麟詩卷

炙硯瑣談 馬觀察墨麟維翰海鹽人詩宗杜韓懷古紀行尤多合作王景畧墓云遭際卧龍同出處才情捫蝨擅風流朝元閣云樓上夜涼間大被水邊春盡散諸姨措語殊妙

柴謙

謙字南屏仁和人

隨園詩話

杭州柴南屏先生名謙作中書時和御

製冬至詩有雪花欲共梅花落春意還同臘意舒之句
叨蒙 恩獎謂有翰苑才超陞御史

徐 瀾

瀾字石原號松巖仁和人冢宰文敬公之姪也
官分水廣文其孫炎居北關荆街

湖墅詩鈔 徐松巖爲文敬公之姪文敬嘗以詩送其
之官分水且勉之云阿咸授外翰筮仕得之睦去家喜
不遠奉職亦不惡小邑圍亂山幽齋蔽空谷荆璆本令
器假茲益礪琢且窮二酉書莫羨萬鍾粟課士先孝友
論文遡枝鹿拔棘植梧櫟刈稂蕃種稔一洗卑陋風持

此報癡叔松巖詩筆雄健嘗賦雪竇千丈峯瀑布云靈巖何截竊千仞插青霄石隙飛泉迸林端縞帶飄始知山有乳誰謂地無潮仙窟朝垂箔鮫宮夜捲綃烟霏停日馭雲燦接霞標帝座通呼吸星河影動搖經冬雷殷殷長夏雪濛濛孕玉騰虹彩噴珠射斗杓淙淙清萬籟颯颯滌煩囂入剡探奇勝脩然神思超

張文瑞

文瑞字雲表號六湖蕭山人官青州府同知

詩衡 青州司馬遊寓園云池底有天留日月山中無地與兒孫確切忠愍事蹟過韻灘云船於怪石叢中過

水自狂瀾倒處飄，厲市湖卽事槎頭小。
泊沽春酒野老相逢話，豆棚亦俱有姿致。

徐亮士

亮士字惠采，桐廬人，諸生。

嚴州府志：惠采幼孤，事母惟謹。及母卒，廬墓側者十三年。後病篤，子孫請歸亮士曰：「此卽吾首邱也。」命鑿穴廬側，吾從親地下矣。卽吟二絕云：「一生壯志成春夢，十載孤身伴母墳。」七十八齡孺慕畢，而今原下謂慈雲窮年寂寂卧荒原，滿眼蓬蒿老半園。幽境不離塵世幻，九泉何處是桃源。遂卒。

壽致瀛

致瀛字閬洲山陰人

國朝詩話

山陰壽閬洲少時以青楓曲水岸茆屋坐

烟村之句見稱藝林後棘闈屢躋遂刻意攻詩友萊軒

集四卷藏於家詩喜多多益善一題或數十首一首或

數千言予所愛獨在少許勝人採蓮曲云若耶蓮種猶

如昔下塘紅盛上塘白採蓮女兒蓮步窄蓮步窄翻輕

波驚小艇不採多和沈菊莊咏史嚴先生云桐江一釣

叟偶與天子宿只知是故人足竟加其腹安金藏云剖

腹明廬陵乃在伶人列女主雖奇克感彼終了微言簡

味長最是高格平生輕財重然諾晚染足痂杖頭錢亦
缺有句云大造至公偏斬健密交雖邇不知貧聞者喟
然

丁煌

煌字鶴泉會稽布衣

越風 丁煌凌敲臺詩大明天子寄奴孫黃金作輪白
玉軒般樂巡游幾忘反校獵丹陽徒衆繁凌敲高倚烟
霞表臺上笙歌聲繚繞遠山橫抹翠黛低微風微皺綠
波小不思開創艱難苦麻拂葛籠輕狎侮禽荒色荒荒
一身豈識綢繆固桑土後人誤指劉寄奴孫失德兮波

及祖往見高澹人天祿志餘云許渾凌敲臺詩宋祖乃
劉裕也南史稱宋祖清簡寡欲嬪御至少安得有三千
歌舞之事耶按澹人止知高祖稱祖而不知孝文廟號
太祖孝武廟號世祖蓋三世稱祖也澹人誤指孝武爲
高祖未閱全史何得妄議古人然其謬始於明焦弱侯
竑其說見焦氏筆乘近時和是題者惟嚴海珊與余及
鶴泉不誤海珊詩三千粉黛哭失聲羣巫又掘殷妃墓
予詩陰室開時知儉德麻拂葛籠猶挂壁嗣孫好作色
禽荒田舍翁聞應歎息若杜雲川詩誰奉赤書歸傅亮
自乘黃屋笑桓元亦指爲劉裕也鶴泉有句云卵色晚

天彈欲破穀紋春浪熨難平爲時傳誦

丁 鶴

鶴字芝田會稽諸生

菊坡詩話 劉戒謀有悼亡詩諸同人輓而和之其中
惟芝田詩最爲悽惋入情詩云我已鰥居二十年巾箱
灰冷悼亡篇無端更觸安仁淚祇自難忘德耀賢老去
詩人空白髮生來令子並藍田好花好月幾能久回首
當初共惘然無端一聯卽唐人長因送人處憶得別家
時之意

金應鑒

應麀字沚派自號新亭慙客錢塘布衣

尊聞錄 沚派先生抱道自高不樂仕進性豪邁視貴
介蔑如也晚年獨喜與余往來余乘小舟訪先生於郭
外坐水觀樓看山邀月口夜不厭樓上供大士銅像焚
香誦經晨夕稽首如老僧暇則讀書賦詩爲樂數十年
來積成卷帙不輕示人余曾愛而讀之其腴美如飫梁
肉其清芬如茹苦茶飲茗汁神氣高逸遊覽不盡如入
千巖萬壑不可指某水某邱爲佳勝地故不及錄其長
日遣懷三十首則熟記胸臆間畧識數篇於此亦可以
見先生之高情逸韻矣先生感時撫事韋郎跡跡不無

青苔及榻之想然而浮雲變幻每一笑置之終無塵俗
擾其靈臺也今年四月八日爲先生七十壽辰余作小
詩附存於末幅巾杖履愛經過古寺城東隱薜蘿浴佛
恰逢天氣好逃禪差喜梵音多米囊花艷俏千觴櫻筍
厨開日正長吟罷新詩還自壽不勞陳語誦如罔藐然
一老典型留今雨堂前記舊遊四壁無塵山入座一間
如畫水明樓魚我無心辨是非鷄蟲得失早忘機蒼英
簞裏風流客錯認年華是古稀

王揆

揆字梅澗山陰諸生

蓮坡詩話 余童丱時受業山陰王梅澗先生揆先生
豪放不羈遊跡徧天下終以不遇而死常記其一詩云
計歷程途十二萬今又經行八九千身是勞勞南北雁
數聲長喚欲呼天

俞公穀

公穀字康先號鞠陵會稽諸生著有耐園詩寄
柳亭詩話 吾越詩人自朱朗諸毛奇齡主持風氣不
落訓詁窠臼沿及近日唐音不可問已若俞鞠陵之荒
村藏遠樹野火送行舟飛花流浪滿孤艇就烟樓謂非
元和之法派乎至若臥牛斜睨客倦鳥獨攜鵝到得無

花看方知作客真一庭明月連花白幾處家山入夢青
遠道無書分客夢青山有約記僧期狂驅遠雁長風急
亂踏隣園野客頑偶爾會心閒拍手忽然得意獨窺書
雲連海氣圍天白風奪秋聲入樹粗猶可躋諸永嘉四
靈之上非優於蘇陸者所能彷彿也

潘樹枏

樹枏字孟扶仁和人

雪齋詩話長白顓公圖字象原以御史巡陞兩浙
署中有小園荒穢不治公一日步得斷碑洗而植之有
宋代遺松四字繫以長歌作者姓名已漫漶不可辨詢

之老吏云此地向有三友居不特古幹參天狀若虬龍
而有梅有竹之相掩映今屋已廢而木亦槁有年矣公
慨然興復築室三楹額仍舊名徵詩以落之集曰投珠
仁和潘樹枬孟扶有題三友居詩云當代繡衣使名公
風雅傳東南瞻節鉞殿陛寄旬宣富國才逾管成書論
放遷樵讎除弊細退食廛勞先庑以安商寂堂因課士
駢論文常暖席被德動寒氈氣誼凌雲上遨遊近日邊
弓招賢七十履倒客三千望擬神仙迴居當禁厄偏壺
樽銷夏日池館憶當年斷碣摩殘字遺歌得短篇寫來
松句好想見鶴飛還天意開靈傑人謀協澗瀍一朝翰

土木萬古見桑田竹裊枝枝翠梅橫樹樹烟龍鱗方得
種虬甲曾成拳風月無邊景衣冠太古前是中堪獨樂
何必羨平泉留記黃岡宅無荒綠野屢懷人同傳舍愧
我困鄉邇念昔曾勞治思常得靜便琴堂羈薄宦花縣
負先賢感此徒鞅掌欣然願執鞭讀公三友畧遺愛幾
纏綿

楊 賓

賓字可師山陰人

國朝詩錄 可師考安城爲友人累戍寧古塔可師赴
闕訟寃得 旨之柳條邊迎親歸作柳邊紀畧塞外

人稱楊夫子書法不染宋元習氣詩體專主沈著身後
散如雲烟矣惟於其門人處得塞外詩一冊故所錄皆
辛苦愁慘之音

國朝兩浙詩鈔 楊可師嘗至寧古塔省其父母賦二
詩云望望吉林峯白雲繞其下登頓及今朝亦得依親
舍父母驟相逢注視還相訝別時髮覆眉胡乃成老大
鄰舍曾慰勞應接苦不暇姓氏未及知空言聊慰藉日
暮細挑燈恍若夢中夜喜極乃更悲不覺淚如瀉其上
書不得達生男亦胡爲四十始省親問心良可悲戲絲
媿老子挽須同小兒西山日已薄鄉國歸何時歎息謂

季弟爾獨無分離承歡廿八載此樂人誰知其

劉世貴

世貴字芸文號雲門山陰人諸生著有嘯月齋集

越風 雲門偶興云桑柘陰陰翠影稠閒身只合卧林
屨坐來深竹不知暑聽去遠蟬如帶秋風定輕烟籠野
寺雨餘殘照入江樓十年塵夢今初覺消受南村景物
幽三四有渭南清風掠地秋先到赤日行天午不知之
致

沈允亨

允亨字孟嘉錢唐人

清波小志 沈孟嘉年十五補錢塘弟子員居清波門
外弔橋之南門對雲居山後臨學士港家頗饒後中落
館於馮氏主人甚敬禮之工詩文善作小楷與人交恂
恂如也爲予母姨丈予髫年未知請益年甫五十而歿
有遺稿數十卷今散失矣予尚存其近體六七章內如
鳳皇山懷古云何人可說興亡事此地堪爲汗漫遊潮
捲空江羅刹怒雲迷故國鳳皇愁獨松不守千年恨萬
楸無聲四海秋留得洗鉛池尚在半林黃葉夕陽樓

屠廷楫

廷楫字爾際號東蒙嘉興人諸生

菊坡詩話 東蒙青芝山詩爲人傳誦鶴岑一日謂余
曰君知此詩佳處何在余曰一檣烟雨過春城句最佳
鶴岑曰此中恨不移家住道上猶疑入畫行亦復語妙
天下

顧玉

玉錢塘西湖舟人

清波小志 顧玉者操舟之人也家靈芝寺側其父善
琴玉幼習之父亡奉母以居風晨月夕放舟湖中撫琴
自樂其時金衢道梁公萬禩雅能琴適在湖夜泛聞琴

聲移船物色之與語喜其樸樸且知其有母贈以金馬
王蓋孝子也後母亡王亦歿王嘗作蓼花引云蓼花開
兮湖之秋兮蓼花落兮湖之涸兮念我生之頭白兮與
蓼花以朝夕兮嗟有母而無父兮徒自傷其孤露兮蓼
兮蓼兮予誰告矣

徐映川

名未詳字映川錢塘人紫凝兄

清波小志 萬工池在淨慈寺門外志稱宋建炎以前
屢遭回祿有善書鳥之術者云須鑿池以禳之僧宗本
乃募化爲此用力者萬人故名萬工池先兄映川先生

有詩云功德池開對梵宮萬人力與五丁同試從北極
收真氣永注南屏禳祝融竹閣晴熏春藻綠雷峯倒影
夕陽紅若將兩岸芭籬折便可明湖一棹通向來湖舫
俱泊藕花居遊人登岸步行必里許方達寺近年總督
李公衛清理水道豪強不得侵佔故船可直泊萬工池
之側一舉足便及寺門頗與詩意合也

劉大觀

大觀字巖雨號達夫山陰人明經著有鞠塋詩
集

越風 鞠塋長身玉立惇行裕才與兄柳村弟柟亭在

西園社中有三劉之目庚辰秋杪訪予潤州官署予贈以詩中有句云老筆難兄擅雄才令弟標宛然成雁序未肯作蜂腰

章承茂

承茂字佩九仁和人藻功孫有退園遺稿

退園遺稿跋

沈梅撰

退園詩中有先君子忌辰一首可

以觀其孝除夕寄兄一首可以觀其悌詳玩其詩退園之素行概可知矣先君忌日詩云風樹含悲已四年年年此日倍淒然圖書豈敢忘先澤涕淚空教灑遠天夢斷吳山雲縹緲愁深淮海雨連綿蓼莪不是尋常什千

古傷心第一篇除夕寄培根家兄詩云又是韶光一度
遷客窗孤坐聳吟肩傷心此夕名除夕轉眼今年作去
年栢葉暖浮新漉酒布袍寒戀舊裘綿鶴鶴原上相思
苦珍重郵筒半幅牋

朱際昌

際昌字會文蕭山人著有窮工集

越風 會文除夕詩云此後身沈未可憑逢人遮莫笑
模稜恩仇兩字魚腸老笠屨三年馬齒增有恨乾坤磨
白髮無知兒女鬧紅燈來朝應寫椒花頌免俗於今尚
未能元人詩遙知小兒女歡笑對銀臺作客每思之在

家翻厭之愛憎何常情隨境遷貧士卒歲真有此况

章大成

大成字集甫山陰人諸生著有青鶴詩選

越風 集甫西陵訪蘇小墓云蕭蕭松栢已堪悲油壁
香車未可追芳草綠遮關盼盼落花紅葬李師師難禁
騷客愁重疊終恨佳人死別離曾說西湖比西子西湖
無地與西施疊用四西字本諸樊南

孟 騷

騷字敏度號藥山會稽明經著有荀莊詩鈔

越風 荀莊先生爲余父執少時聞其緒論以窮理讀

書爲尚長於七律卷軸之氣甚華與芝田廣文伯仲之
間如春波橋懷陸放翁云廬江小吏買臣妻邂逅園林
野寺西一片石橋流恨水新詞題罷夕陽低西園荒草
卽靡蕪爲囑王孫歟故夫只許春風偷半面玉階行過
草旋枯安得鸞膠續斷絃新愁舊恨兩綿綿琵琶不是
韓琵琶彈出離鴛亦可憐釵頭鳳是斷腸詞一死還應
爲餅師燕子銜泥頻易主蕭郎猶有再來時四詩風致
嫣然頗得唐人口吻

袁旦金

名未詳校之祖

隨園詩話 先祖旦金公有詩一冊皆蠅頭草書予幼時曾手錄之一行爲吏屢移眷屬竟爾遺失僅記其咏雪云忽然卷幔如逢月可惜開窗不見山途中遇雪云四望平林飛鳥絕一肩行李店房疎

朱稻孫

稻孫秀水人鼻尊孫昆田子

小有天園紀畧 南山五老圖者仁和汪守湜字又持號約齋方六十時令嗣廷對廷揚謀所以爲壽者迺闢榛莽剔巖穴作亭於南屏屬萬經書南山亭額復於亭側種梅數百本時與王弼徵周大年周念修吳佩西爲

五老會日哦詩其間繪圖志快秀水朱稻孫題一詩云
夙聞南山南泉石足幽致五老日盤桓鴈咏適其志爲
誦江郎詩處順故無累

沈施瀛

施瀛字錦帆仁和人

湖墅詩鈔 沈錦帆出馬端臣諱紳先生之門端臣書
畫宗二董壽百齡無子生養死葬皆錦帆任之錦帆嘗
賦漱江雪夜詩云漠漠江天暮靄深臨風把酒一開襟
家寒有夢馳千里署冷憑誰寄萬金戰退玉龍聲寂寂
舞來銀甲夜沈沈懸知太白峯前景偏繫飄零遊子心

葉之淇

之淇字待堂平湖人與弟筌亭皆以詩名

國朝兩浙詩鈔待堂所著有寒碧山齋詩集陸太史
奎動爲序子映榴等雕版絕精太史於雍正丁未南還
感舊云五子唐音妙入神三升魯酒見天真江南何處
無芳草絕意風流鏡閣人爲待堂作也公羽學使高年嘗
曰讀待堂古體詩如蒼松翠栢堅勁可愛而又工於咏
物近體諸作無一不盡其妙殆由天授非人力所得而
致也

沈燮

燮字御李平湖諸生有蓉湖集

國朝兩浙詩鈔 沈御李爲南疑從弟蓉湖集三卷陸
陸堂於東谷諸草廬序之御李嘗客阡江其地向無鴻
雁十月旣望之後忽有翩然而過者因賦長句云衡陽
見說飛迴處伴月迎霜又遠遊片羽健凌黔嶺夜數聲
寒帶蘄門秋斜封未許傳鄉信旅館偏能動客愁好待
管灰吹信早春和同爾下江州

宋祖昱

祖昱字斌貽號西洲會稽人諸生著有西洲類
稿

蓮坡詩話

山陰宋西洲祖昱才思敏捷一日可得數

千言名滿長安其弟西椒祖晟亦銳志苦吟而西洲頗倚才自放記其送高雲老人南還詩云高雲大士好消閒六十年來非等閒生旣逃名歸白社死應埋骨在青山父長白先生爲越中名宿著有柳亭詩話考據精博其徵引近事可備掌故

按柳亭詩話云商山一局乃子房善爲調濟之術觀其與建成侯語可悟其徵而唐人每多責備之言如杜牧北軍不袒左邊袖四皓安劉是滅劉蔡京如何鬢髮霜梢似更出深山定是非之類豈謂真有其人耶曾記先大夫咏史詩曰漢使入商山山人陳厥旨豈有白髮翁拒父從其子留侯翻然曰余旣知之矣狎鶴羨鴻雛賤目而貴耳龐眉數老人我冠四皓稱太子能得士居然羽翼成馬上得天下對妾涕淚零

詩正計誠善商山操愈清幽盡古今疑案則知姓名
蓋蓋皆好事者爲之也先大夫白登懷古詩知何馬
上爲天子却向城頭假婦人留侯曲逆同一機智也
云云觀此則不獨西洲之父工詩卽其祖吐屬亦迥
殊凡近可稱一門風雅

金志章

志章初名士奇字繪自號江聲錢唐人雍正癸
卯順天舉人由中書官至口北道有江聲草堂

詩集

青瑤詩話 錢塘金繪自志章鵲鵲塘云客情鄉思總
淩迷睡起蓬窗日欲西忽聽一聲行不得鵲鵲塘外鵲
鵲啼此天籟也

尊聞錄 江聲爲吾郡沈閣齋尚書高弟讀書作文皆
閣齋指授有法度宛陵梅雪坪先生官浙泰順令至會
城與江聲契厚先生不輕許可人物而論詩格律尤嚴
獨愛江聲清真大雅江聲之遂安雪坪書斷句送之云
生衣漫換路猶寒落絮飛花春已闌挂席正逢江月滿
好風一夜上嚴灘往長沙吳文琳巖遺以七律云願見
其如相見慳新詩想見好容顏已憐客屐迷吳地何況
征帆向楚山健筆風雲誇吐納壯遊奇勝快躋攀湘江
桂嶺郵籤換定得題名蒼翠間二詩附載於此以見江
聲爲詩翁推重如此

桂堂詩話 江聲五七古鋪陳終始落韻堅強七律彈
丸脫手溫粹精圓警句如玉輪晴闕三分影珠殿秋扇
四面窗松門暮靄霏成雨佛座流泉散作花人行黃葉
露沾屨僧定綠蘿風過溪綠樹暗藏香口驛流鶯啼過
睦州城長沙城近偏多雨衡岳山高易及秋八桂好山
皆畫本九疑斑竹是秋痕風林白蠟收蠻女社鼓荒司
賽黑神鑿翠一龕藏佛火吟風千股墮松釵泚水大風
來泗上呂梁飛雨渡黃河荷葉水香千點露豆籬蟲語
一鉤絲疎花倚壁疑人立明月侵堦儼雪堆人靜忽聞
孤寺磬午涼猶噤一聲蟬雷砑萬石車爭險碇束重關

水建瓴退飛力盡盤鵬健失隊羣驚代馬空西風塵起
駝爭圓紫塞春深柳尚髡一鏡鎔銀光艷艷四山橫黛
影微微精金良玉不足比其質哀絲豪竹無以喻其音
固由洗鍊功深亦是得天者厚

周 錚

錚字鐵士仁和人雍正癸卯乾隆戊午兩中副
榜有塘南吟稿

涑園選耆舊集 先生自言詩於質樸老蒼中寓深醇
之味綿邈之音陶寫性靈融冶理趣不作倔强語安難
識字持論如此斯亦今人之藥石矣與宋杏洲交好嘗

寄詩云相從襍被下吳船草長鶯飛二月天一樹好香
聽未得梅花如雪小窗前樓臺西去畫難如我却夢川
五載餘此後溪山都付與不煩魚鳥更躊躇兩世交情
久更真青氍門戶合長貧那知舊事重論日同作烏蓬
聽雨人

鄭世元

世元字黛參號耕餘餘姚人雍正癸卯舉人有
耕餘集

山居詩話 耕餘贈周敬詩人皆欲殺今之自我醉須
埋昔者伶可稱絕對又詩云古人不死吾猶在秋氣無

情物亦生苟全始信談何易餓死今知事最難纔說尋
貲去耦耕定知不是耦耕人一秋雨漲茅塘發力盡柔
篙逆水船皆卓卓可傳若新釘尖頭小統棚晴天除脫
雨衣裳繫門隣借村農具出港人從寫藥方諸子盡能
划短漿兩醫時共坐中艚則純乎誠齋矣耕餘亦有
學宋人處却下筆老辣如於今負背多芒刺以後甜頭
望蔗漿畢竟與宋人不同也若樹底暖鶯初調舌客中
寒食最銷魂則晚唐高調元人所不能仿矣九日黃
花薰酒面雨峯紅葉落鄉心耕餘別春薦句也何等蘊
藉繞樹夜烏棲不定隔花秋燕夢同驚格律少遜矣

詩有極淡處却不可強學如耕餘晤韓映碧便當見日
相安慰猶恐來時不易容是也天地有身真大累文章
無口更何辭氣魄極壯殘雨一城雲在樹疎烟幾處月
籠沙却又幽細才人無所不可

青瑤詩話 鄭世元看舞刀云閃閃搖銀海團團滾玉
輪視鎗法云毫光團白雪風雨散梨花舞刀舞鎗不可
互易今讀者如置身玉輪梨花之間是何等神勇

披薰參先生菊花詩半年辛苦綠花使兩月艱在得
酒降可爲天下種菊人寫照然終不若芳草路旁都
是恨慕山樓上對
誰青使我神移也

江作楫

作楫字汝舟由歙縣入籍金華雍正元年鄉薦授天台教諭所著有鳴秋草

金華詩錄 汝舟哭弟詩云宛轉不能分爾痛彌留猶寄勉兄辭殊覺淒惻動人又有句云欲哭窮途羞阮籍請辭詭遇重王良已拚野性隨麋鹿一任人呼是馬牛亦殊兀鼻

范 咸

咸字九池號浣浦錢唐人雍正癸卯進士入詞垣官終臺灣御史有浣浦詩鈔

臺海見聞錄 正月元夜未字之女偷折人家花枝竹

葉爲人詬詈謂異日必得佳婿范巡方咸有詩二截女
郎元夜踏蒼苔攀折青枝笑落梅底事含羞伴不采月
明犬吠有人來難將心事與人知暗祝燈前有所思爲
是傾城顏色好不教開到落花時 番俗成婚後三日
會親宴飲各婦艷粧赴集以手相挽面相對舉身擺蕩
以足下軒輊應之循環不斷爲兩匝圓井形引聲高唱
互相答和搖頭閉目備極媚態范巡方有二截句連臂
相看笑踏歌陳詞道是感恩多劇憐不是弓鞋影一曲
春風奈若何妙相天魔學舞成垂肩瓊珞太聰生分明
卽是西番曲齊唱多羅作梵聲 七里香木本花叢生

如緋珠婆婆可愛五瓣色白香氣濃郁能辟瘴氣所種之地蚊蠅不生一名瓊花又名瑒花又名玉蕊又名山礬又名春桂范巡方詩翠蓋團團密葉藏繁花如雪瑤幽芳分明天上三株樹散作人間七里香丹桂婆婆猶入俗繡毬攢簇太郎當何如瓊島嫣然秀采掇還傳辟瘴方又有六絕句唐昌玉蕊無踪跡后土瓊花再見難官閣獨傳春桂影婆婆長得月中看小葉荼蘼一丈餘花開五出襲瓊琚生憐青瑣無消息難覓吹簫紫鳳車瑤臺原不在人間素艷何來綠玉鬟長見蕊珠宮裏雪只緣地近補陀山聚仙也合依稀似玉質濃香總不同

欲向通明上封事彈文先斥垢花風幸留七里香名在
認取山礬爲寫真寄語世人休聚訟冰姿原不藉前塵
瀛壚合是洞仙家宴賞貪看玉樹花賦罷新詩消受得
春風何處七香車水仙花一本五六莖鮮芳絕倫與

東市上標臺灣水仙花頭其實產自漳州及蘇州也范
巡方有詩霓裳翠袖翦吳綾烟霧輕籠弱不勝綽有風
神凌海嶠憐他冷艷斲春冰銀盤皎潔還疑雪金醅嬌
嬈好試燈擬與梅花同配食水仙王廟最相應

倪鳳儀

鳳儀字虞音金華人

金華詩錄 虞音雅才逸氣探原樂府立意正大命詞
豪俊卓然方家又所作絕有關係不沾沾於流連光景
之篇近人中殊不易得去今未久聲望闐然蝸蟻沸響
鸞鶴失羣安得舉此種詩力爲振之使婺州復見古風
其秋閨怨云露草繁階蟋蟀吟空庭對月搗寒砧衣單
祇念關山遠那惜秋涼到枕衾用意忠厚正始之音

趙用熙

用熙字斯敬蘭谿人康熙五十三年舉人雍正
元年孝廉方正授博野令

金華詩錄 博陵不寐云暫許晨昏供子職非關老病

乞閒身寓中雜錄云落拓猶吟枯樹賦郎當不舞柘枝
詞又云慵貪躡鼠千鈞弩喜共榮英九日觴淡於進取
所性然也而耕餘供職高堂健在小人有母團圓家慶
屢屢見之詩中眞敦本崇實之人其蒞博陵有八不要
錢說傳頌於民間

夏兆豐

兆豐字大田會稽人雍正甲辰舉人

越風 大田詩名與芝田丁廣文相埒同居題扇橋之
旁柴兼山所云巷北惟一柳橋東有二田者指此也鄉
薦後屢困公車齋志以歿遺詩甚少有溪魚小躍搖山

影沙鳥低飛避櫓聲一聯膾炙人口

按夏經術湛深丁當稍遜然文則丁不如夏詩則夏不如丁嘗見芝田滕縣遇風雨一篇其領聯云地近沛宮風自大人歌周雅雨無私出句已佳對句忽從孟子滕文問爲國處落想尤確切新奇

汪由敦

由敦字謹堂錢塘人雍正甲辰進士及第官至協辦大學士晉吏部尚書贈太子太師諡文端著松泉詩集

詩衡 嘗見文端雨詩云黑雲一片催詩客翻却天瓢來頃刻簷垂飛瀑萬瓦鳴虛堂颯颯驚秋聲憶當夏旱苦相望玉粟珠襦拜嘉貺此時勤買玉壺春側耳不負

同心人輕雷過後淨天宇不賦秋霖賦甘雨其題云題聽雨詩後必另有聽雨詩惜未之見

周 霽

霽字雨甘號西坪錢唐人雍正庚戌一甲第一人授修撰歷官陝西學政

杭州府志 周霽於書無所不窺今古文兼諸家所長詩宗盛唐別出機杼

梁詩正

詩正字養仲號蘄林錢唐人雍正庚戌進士第三人官至大學士卒諡文莊有矢音集

紅亭詩話

李長蘅過穀城滕縣口號云穀城山好青

如黛滕縣花開白似銀二語極爲詩家所賞漁洋山人有詩云薛北滕南屢問津遠看山色黛眉新惟餘一事堪惆悵不見花開白似銀乾隆辛酉予過東阿旅店壁上有梁蒲林相國詩云東阿南望盡模糊如黛山光暗欲無我比漁洋尤悵恨風蓑雨笠穀城圖

孫灝

灝字載黃號虛船錢唐人雍正庚戌進士由翰林仕至通政使

紫竹山房詩集

春日下直車中偶得一聯屬虛船足

成之約他日集中並載僕不須別造矣改官後追想前
因情景如昨乃更續完首尾以補向者之缺詩云自咤
朝回晚輪蹄爾許忙有情惟酒殘無分是春光瓦壠見
新草堤腰思故鄉祇應攜薄醉索夢就匡床附虛船原
詩云五字哦佳句蕭寥味共嘗有情惟酒殘無分是春
光官冷言愁易鄉遙遺夢長聯吟謝何遜枉瘦沈東陽
任應烈

應烈字武承號處泉錢塘籍會稽人雍正庚戌
進士由翰林任南陽知府

隨園詩話 吾鄉任武承太史名應烈出守懷慶中年

乞病買鑑湖快閣以居乃陸放翁舊地作詩四首和者如雲先生句云疊石畧存山意思蒔花聊破睡工夫風流何處追狂客踪跡重教記放翁甲戌歲札來索和并招往遊余寄詩奉答終不果往壬寅遊天台始登快閣先生亡久矣精舍數間全覽鑑湖之勝想在日清福不減賀知章

倪國璉

國璉字西崑一字紫珍又字子珍仁和人雍正庚戌進士由翰林官給諫

隨園詩話補遺 杭堇浦論七律不喜拗體余道詩境

甚寬實有因拘轉峭者因誦倪紫珍先生客中憶西湖
云江水不如湖水澄南峯涼暖時堪登入雲但問采樵
客踏葉偶隨歸寺僧一掬泉因瘦蛟活滿山桂與青霞
烝白波渺渺未可渡空倚葛陂三尺藤似此八句一調
平仄便索然無味矣杭亦以爲然

商盤

盤字蒼雨號寶意會稽人雍正庚戌進士由編
修改授鎮江同知官終雲南府知府有質園詩
集

蓮坡詩話

商蒼雨編修盤號寶意精音律升菴琵琶

對山腰鼓兼其風致乙卯秋入都路經水西莊余出歌
者演劇蒼雨留詩曰記得東華甲夜長九枝絳蠟膩歡
場誰知碎雨零烟後又聽朝來翠袖涼重簾消息隔傾
城相見翻疑面目生不用掩羞裁月鼻當年着眼已分
明又錦屏銀燭夜闌時細細風懷脈脈知結習猶煩大
迦葉麗情都付小楊枝司空相見何曾慣學士休言不
合宜禪榻茶烟惆悵在頓教雙鬢忽成絲又妙高臺上
好風光值得東坡醉一場解唱幾時明月有元郎本是
舊袁郎水西秋景未凋殘送客留情坐夜闌惱亂好花
紅着眼不教攀折只教看後二首指元郎也昔東坡命

袁綢歌明月幾時有把酒問青天之句是日元郎度曲
毛郎疊奏寶意自吹紫簫和之

越風 丙辰之歲吾郡館職者六人曾賦六君詠紀登
瀛之盛栗齋年窳少簪筆之餘兼通治畧其在臺垣頗
有風力昔北魏尚吏事以朝士蘊藉爲潦倒若栗齋者
豈可以才人目之庚午卒於官余在京以詩哭之云驄
馬西臺成結局梨花左掖記同看至今宰水已拱檢其
遺稿尚有餘哀

按百年來吾鄉鄉閭之盛無如康熙庚子強半皆知
名士其宸著者周徐彩粹存魯曾煜故人胡俊希張
徐廷槐等山余族祖思淵聖水會榜之盛無如乾隆
丙辰預館選者六人周應宿念山張麟錫心葵潘乙

震爲軒羅世芳蒼山王秉和鳳山史積琦栗齋諸君
皆與寶意善寶意送筠軒還越詩云昇平朝野總君
恩句外間將出處論又云莫歎神仙容易別故鄉處
處是蓬萊用梅溪直海中之蓬萊語也可謂立言有
體其生平佳句甚多如姑蘇云君王本是堪亡國種
蠡何能共復仇廣陵云博得雷塘甘一死賺他杜牧
又消魂黃鸝樓云大抵神仙多幻術本來名勝擅中
原楚中云陳轅一言能復楚零丁三戶竟亡秦將歸
故里寄同學云名心未斷難遺世晚景無
多怕受恩恩極俯仰低徊神遊象外之致

吳煥文

煥文字樸存會稽人諸生著有樸庭詩稿

越風 樸存過徐紫珊先生舊宅云過此易垂淚况逢
秋氣涼名花惜前度黃雪滿山房新咏誰爲序清標不
可忘西冷二子者往事記漁洋宅名黃雪山房有銀杏

兩樹王漁洋詩稗畦樂府紫珊詩更有吳山絕妙詞此
是西冷三子者老夫無日不相思

張 湄

湄字鷺洲號柳漁錢塘人雍正癸丑進士歷官
兵科給事中

臺海見聞錄 臺俗婦女靚粧入市無肩輿以傘蒙首
而行時伸時縮以窺行人張巡方湄有詩云香車碧憶
厭紛紜擁蓋微行擬鄂君一隊新粧相掩映紅渠葉底
避斜暉 臺民易構訟親送檳榔卽解巡方詩云睚眦
小忿久難忘牙角頻爭鼠雀傷一抹紅腮還舊好解紛

惟有送欖榔 番衆以穀熟爲歲月圖爲一月常以藤
絲編爲毬會社衆爲蹴鞠之戲與鞦韆爲樂張巡方有
詩藤毬擲罷舞鞦韆世外嬉怡別有天月幾回圓禾幾
熟歲時頻換不知年 七夕爲乞巧會家家設牲醴果
品花粉之屬夜向檐前祝七娘壽或曰魁星於是日生
士子爲魁星會竟夕歡飲張巡方有詩露重風輕七夕
涼魁星高譙共稱觴幽窗還聽喁喁語花果香燈祝七
娘 臺草木經歲不萎花開無節黃巡方云予仲冬按
部至斗六門見桃花方謝至笨港見人擎荷花數枝回
署見榴花照眼丁河峯歲除一聯迎年蓮菊猶芳奚但

梅傳春信獻歲瓜茄未老還同韭薦春盤張巡方有詩
少寒多煥不霜天水葉長青花久妍真箇四時皆似夏
荷花慶臘菊迎年

海外異錄 菩提果土名香果似枇杷實於五月間西
域分種花有鬚無瓣色白味甘而香極似玫瑰鷺洲侍
御咏云清供菩提繞室馨金包柑橘麗繁星更憐斗大
波羅蜜磔磔真同佛髻青足爲菩提開生面矣 又曰
中秋夜士子飲博製大餅以象月硃書元字擲四紅者
得之取秋闈佳兆也張鷟洲詩畫餅香中人盡醉嫦娥
親見奪元歸

國朝兩浙詩鈔 張柳漁秋日南屏坐雨云白石虛襟
秋水環黃皮舊塔夕陽關荷聲冷帶跳珠雨鐸語遙飛
潑墨山鳥逐漁舟投港外人依禪榻嘯篁間絺袍無復
緇塵浣廿載重來鬢就斑

按柳漁書法秀逸雍正癸丑 殿試卷無出右者進
呈列第一以策語未能稱 旨置二甲授庶常及居
官臺諫頗著風節辛未歲 聖駕南巡因念西湖南
北兩山塚墓纍纍恐有司經理未宜於 鑾輅不經
之處悉遷徙紛更乃 奏請思諭着地方官善於經
營以仰體我 皇澤及枯骨之意疏入 上嘉納焉
又按柳漁赤壁詩云江山難洗三分蹟風月猶傳兩
賦心感懷云難馴龍性貧尤甚欲闢蛾眉老未工皆
雋雅
可誦

汪師韓

師韓字抒懷號韓門錢塘人雍正癸丑進士授翰林編修後至侍講罷歸

談書錄 少時與友人論烟草因搜羣籍輯爲一編曰金絲錄必已見刻本者方錄之凡四卷曰原起曰劇談曰品題曰炯鑑引書三十餘種庭訓格言一則清文鑑孤萊類譯文一則露書錯篇一則物理小識一則方中履語一則綏寇紀畧一則日知錄一則遲山堂臆史一則蚓庵瑣語一則香祖筆記一則分甘餘話一則黔書一則燕山閣知新錄一則景岳本草一則本草彙言一則龍沙紀畧二則澳門紀畧澳蕃篇二則澳譯殿於篇

一則畿輔通志土產一則名宦王隲一則福建通志一則律例二條方望溪宗伯條奏并部議陳榕門中丞江西條奏并部議其詩詞則龔山集都下竹枝詞二首鮪賸引詩蓮龔集美人飲酒詩十五首鬲津草堂詩一首錢良臣雜詠詩一首敬業堂詩一首樊榭山房集天香詞一首并序四子聯句詩一首無不宜齋未定稿長律一首所惜韓慕廬宗伯常命其門人輩賦淡巴菰歌今已無一篇傳者錄旣輯成復自爲叙之曰烟草之名若石馬浦城衡陽之繫以地黃紫以色生熟以製大率市暨賣價之名傳於牛童馬走之口以余所聞曰打姆巴

古曰淡巴菰曰淡巴姑曰大孖古曰淡肉果曰擔不歸
曰醺曰金絲醺曰金絲烟曰芬草曰烟酒而總名曰烟
世未悉其名莫究所始遂疑起自近百年來者暇日採
諸舊聞附以詞流題咏歸之於懲戒彙爲金絲錄昔東
華子述大樂器史焦革酒法桑苧翁備言茶之原之法
之具並著以爲經以烟草銷芬畛啜歷亂冬春浮食籍
之百襲準禺筴之萬口茶鎗酒榼時交進焉著於錄或
者不爲文士所鄙笑耶附錄少作四首移根呂宋如何
年芬草從新拜號烟匹馬就韁歸漢壘一軍提鼓入蠻
天漸教禁權權豐幣競以噓吹費壯錢茶苦南中空紀

錄酪奴人久薄春泉瑤草耕烟歲取資黃雲葉葉柳絲
絲茅柴霽景編籬薄篋篋宵分析縷遲風俗小圃盛滿
把火傳重暈結相思傾心還在壺公在鼻觀通參出愈
奇龍巖石馬外諸餘于橐于囊聚物殊食籍數浮黃矮
菜詞林名重淡巴菰三餐果腹初虛口五字微吟正惜
鬚攜取及時供絡繹并申僮約古從無偶共香燒性已
諳一枝爐焰手頻擔方言有底爭衡酒詩境無聊作配
藍爐氣澆依吞篆少熏心虛美落灰慙不知通介誰邊
得暇米芸編使筆談

張映辰

映辰字星指號藻川錢塘人雍正癸丑進士由翰林仕至副都御史

雲蘄齋詩話 映辰起家詞賦矢口而吟冲然自得著京邸家塾使楚使秦等集集中捉騾行一篇尤得風人之旨詩云軍行裝載需馬馱大吏檄下徵官騾縣官捉人兼捉騾惟恐濡滯遭譴訶吏人持符下鄉堡虎踞當道森閭羅行人未起徵調急纍纍負重來關河道旁忽遭捉騾者鞭之令下遑問它簦屨貨物盡棄置徑牽騾去誰敢呵囊金搜取意未厭但飽吾欲還汝騾可憐獨客無齎糧騾去人存空自傷朔風吹雪盈路傍依人檐

下涕泗滂留之七日不得去眼見溝壑相填將方今

朝廷養黎赤各救焚溺拯饑荒轉輸供億一切出內帑絲粟不以煩編氓此方官吏豈獨不聞見胡爲乎縱令數屬爲民殃嗚呼東鄰有騾不敢畜西鄰納錢騾亦捉君子耆老盡徒行鉤衡空駕轅端王縣官打鼓催捉騾吏人告言騾難捉騾難捉錢已足安得年年歲歲將騾捉幾家歡笑一路哭

隨園詩話補遺 余十一歲與張星指映辰侍郎同受知於王交河先生入泮張後爲翰林前輩今六十四年矣其子雲璈孝廉以遺稿索序錄其督學江西夜坐云

丁冬遞響到簾櫳何處鳴號萬竅風夜色似年難得曉
燈光如豆不成紅沈憂觸撥千端集舊事雲烟一笑空
饑鼠遶床揮不去睡鄉未許夢魂通其他佳句如簾影
日移直樹枝風撼鳴綠樹鳥棲連影動好花風送隔林
香樹外青山才一角屋頭明月恰當中最會早起通宵
月先看黃河隔岸山皆集中精華也

全浙詩話卷四十六終